

石中英先生

錄音段落：11

時間長度：29 分 13 秒

Accession No. YP024

時間	受訪者 / 訪談員	內 容
00:00	訪談員：	阿石生我想問下，你啲子女呢，或者你嘅太太啦，包括你太太，喺咩時候呢，係知道你當年嘅經歷，或者你係咪...一開始話畀佢吓，定抑或係...揀一個適當嘅時間同佢哋講？
00:21	受訪者：	我太太就好辦啲，因為我哋喺拍拖時候呢，都可...即係準備結婚呢，我已經講畀佢聽㗎喇，呢件事呢，係人生咁大件事，你有理由唔講佢聽，咁我太太呢，有個好處就係呢，第一，佢係我哋大家喺華南嘅同事㗎嘅，吓，咁第二呢，佢本身就係...喺香島中學畢業，即係所謂左派學校，咁所以佢係...即係對呢啲咁嘅情況...佢唔需要太理解，但係佢亦都唔會反感，咁但係都...咁但係我哋...都唔會大肆宣傳呢件事啦當時個氛圍，咁到細路仔呢，就問題大啲喇，即係...一個人嘅潛意識好奇怪，一直呢，我都有主動講畀細路仔聽嘅件事，咁直到一日呢，就係...我個仔十六歲，我個仔家下廿一歲啦，即係其實都係好近嘅啫，五年前度啦，到我個仔十六歲嗰年呢，我媽媽有一次呢，飲茶嘅時候講...唔知點解爆響口，(笑)你老豆，嗰時坐監嗰陣時，點點點點點，咁於是我個仔呢，就好 surprised 咁樣，望住我問「Daddy，乜你坐過監嘅咩？」咁樣，咁我覺得...即係刻覺得係好...唔知點 react，咁但係跟住就諗，到底我做錯咩啫？點解我唔講畀我個仔聽呢？係咪我覺得我對...為自己嘅所做嘅行為好羞恥？我唔應該係嘅，我有後悔呢件嘢，我亦都唔覺得我自己羞恥，所以我就將我嘅故仔，一五一十講晒畀我兩個細路仔聽，我個仔同埋個女聽。
02:12	訪談員：	係喎...嗰陣時喺香港，返屋企之後講嘅。

- 02:14 受訪者： 喺香港，喺香港，嘎（是），喺香港。
- 02:16 訪談員： 即係嗰餐飲完茶...
- 02:17 受訪者： 哦，之後呀，返香港...之後喺...喺屋企講啦，吓，即係講畀我個仔聽，咁佢哋當然一知半解唔知咁多嘢啦，吓，咁...
- 02:30 訪談員： 講咗畀佢哋聽之後佢哋個反應係點呀？
- 02:33 受訪者： 個反應...係...(停頓)understand 咁囉，即係明白，咁佢係...
- 02:42 訪談員： 有追問。
- 02:43 受訪者： 有追問，我個女呢，一般就有乜點...問嘅，佢唔係好鍾意...理政治嘅事幹。
- 02:50 訪談員： 佢係大嘅？
- 02:51 受訪者： 大嘅，大女，咁佢係個仔呢，就係...比較少少鍾意政治嘢，所以我...係一路呢，特別呢排呢，好多活動呢，我特登搵埋我個仔，出席，譬如六七動力國慶聚餐呀，或者一啲嘅會，最近佢亦都睇緊一啲阿 Gary Cheung 嗰本...英文版嘅《六七暴動簡介》（注：書名應為《香港六七暴動內情》，英文版為 *Hong Kong's Watershed: The 1967 Riots*），即係我話你應該要了解下...嘅情況，我唔係要你認同我做嘅嘢，但係點解我會...點解我要做一件咁嘅事呢當時，你明白，咁我個女呢，就仲奇怪，奇怪一樣嘢呢，好...我諗有乜啲 YP（Young Prisoner）個人會咁㗎，我係...即係有啲人呢佢會係...嘩！呢件事係民族仇恨、民族糾紛，咁你應該好恨英國人，因為經過咁多年嘅沉寂，我已經係諗清諗楚一樣嘢，我已經昇華咗，我唔再係民族嘅...仇恨，我唔會恨英國人，er...亦都唔會恨一啲...當時咩 er...路線錯誤帶錯我哋嘅中國人，我只係覺得呢，喺個政治嘅旋渦入便呢，一個國家嘅機器，係點樣殘...即係點樣虐待，或者即係殘害佢下一代青年人，好似我哋要...畀

警察打呀，坐監畀人打呀，我哋坐監呀，虐待呀等等，呢啲係一個權力，即係...一個國家嘅機器，係點樣嚟對待我哋一啲咁嘅嘢，咁嚟呢個問題上係我...而且呢，我係反而係覺得呢，要...係...特別嚟廿一世紀呀，即係...人類嘅和諧，同埋用一種愛係去建立新嘅秩序係好緊要，就唔係用一個恨嚟去建立秩序，所以當我個女話...嚟 Cambridge 讀大學，佢話「Daddy，我參加英軍...即係英國皇家海軍劍橋大隊好唔好呀？」我話好。

05:10 訪談員： 咩大隊話？

05:11 受訪者： 英國皇家海軍呀，劍橋，佢叫 Cambridge Unit，所以我個女有晒制服係軍裝，佢有軍階嘅一個英軍，當然佢係學生兵，已經唔同啦嘛，你諗下，就算香港呢個地方，中英都合作，當時抗日嘅時候呢，中國、英國合作去打日本人，你只能夠...咁唔等於係...即係永遠嘅敵人或者永遠嘅朋友，而係即係...你係睇咩...即係你係睇咩階段上係做緊咩事幹之嘛，吓話，好似現在中英嚟呢個合作係前題咁嘛，唔係鬥爭係前題㗎嘛，係咪？即係現在好似一齊要反恐咁樣，你中美合作，好多係...可以化敵為友，或者化友為敵，呢樣嘢係變化之中，所以我係 er...我都覺得好自豪㗎，我個女係英國皇家海軍，我唔會因為英國人係咁樣 er...鬥爭過我或者點樣樣呢，而咩，但係呢個唔等於嗰段歷史唔記錄落嚟。

06:29 訪談員： 所以你對...你對 er...即係子女呢，嗰個反應就係聽咗之後呢，好平和嘅，或者係...接受嘞，係接受爸爸以前當年嗰個經歷。

06:41 受訪者： 係，佢哋比較係接受，嘎（是），有一個好強烈嘅咩嘢，但係我問過另一啲人呢，就真係...係唔講畀細路仔聽嘅。

06:52 訪談員： 但係呢啲例子多唔多呢？

06:54 受訪者： 多呀。

06:55 訪談員： 多係...好多呀？好多...

06:57 受訪者： 相當多，有啲人故意唔提，有啲就唔提，即係...呢個就係一個問題嘞，呢個...呢個就係點解我哋需要解決嘅問題，即係...呢個社會上點樣睇呢件事，點樣睇呢班人呢？吓，佢係啱呀啱，錯，錯喺邊度，你話畀佢聽，你唔能夠唔理佢咁呀，即係集體失憶係完全係...唔應該出現，即係你...係畀塊鏡佢睇，你係咁...咁嘅樣，即係咁樣樣，你唔能夠直程摸下塊鏡，你係唔存在嘅，咁佢自己就覺得自己...係...自我形象，或者好高大，或者好低微，都係唔啱嘅，個社會上係唔能夠...一致向前，係分裂嘅仍然，個族群係會撕裂嘅，即係好似現在個社會上...即係...因為...歷史如果假假地講呢，就叫勝利者的歷史，六七之後呢，就梗係呢班係左派暴徒呀，搞衰香港，即係已經成為一種咁嘅...一個標籤嘞，一個 label。咁嘅情況呢班人呢，就已經係...喺個社會嘅角落嗰度呢，就好多下流邇邊賤格左仔呀咩嘢咁樣，係嗰陣燒死林彬掙菠蘿呀啖咁樣，就係呢班人，搞亂香港就係呢班人，咁佢係個真相係咩嘢呢？你講番...你要畀人有個機會有個真相，就算真相係咁樣樣，你呢個真相之後係點樣和解，即係佢...邊度...啱嘅邊度錯嘅邊度，係向前看先得㗎，唔能夠積累一啲咁嘅嘢，好似現在咁樣，你啱下，嚟，現在好似民建聯，喺商業電台做一個節目，十八銅人落區，嘩！要追打，民建聯，er...呢個咩咁樣...燒死林彬，係冇乜意思㗎大家都，完全唔係一個理性嘅嘢，而係習非成是，一種...將佢傳統一種一啲...某啲嘅觀念強化咗喺佢身上，標籤、標籤、標籤、標籤，吓話，咁嘅時候你個社會點進展啫，即係呢樣嘢令我最失望嘅一樣嘢就...我喺大陸，你見到呢，你可以話佢專制，獨裁，但係你睇到呢，佢個社會係...經濟係變化，人嘅生活係變化緊，係向好個個方向，當然有壞啲嘅，有暴發戶呀啲嘅，你唔使講嘞，呢啲我都好清楚，貪腐呀都有，但係我哋係向前緊嘅，而我哋呢。

09:25 訪談員： 你講香港。

09:26 受訪者： 如果在香港，仲停留喺大家...糾纏喺過去，鬧嚟鬧去，

現在又鬧嚟鬧去，你又邊有嘢做出嚟呢？即係回歸十四年做咗啲咩出嚟㗎？你話畀我聽做咗啲咩出嚟？

09:38 訪談員： 但係香港人好咩嘛，即係...好緬懷嗰段美好嘅日子。

09:42 受訪者： 係呀，咁你嘅情況你就自己邊緣化嘞，你整個大陸係向前，整個...整個世界係向前，大陸成個中國都係向前，連台灣都向前，咁你香港就企喺度呢，就係...互相爭吵，邊緣化，咁我哋...我覺得...我哋做啲口述歷史，或者我要參加講，或者我協助做呢啲嘢，我哋唔係想個社會...更加撕裂、更加分裂，而係想呢件事你...你唔提都有人會講㗎嘞，你係去搞就最好大家儘快搞清楚佢，係和解咗佢，大家一齊向前啲嘢，如果唔係呢，就到時到候又一個撕裂，又一個...互相指責，互相標籤，就...成個社會就係...我哋香港就係一路係咁淪亡落去，呢樣係最擔心嘅。

10:35 訪談員： 即係我諗你...或者你哋係咪都好想呢，即係包括你本人啦，即係好想有個機會等社會呀，了解你哋多啲？

10:44 受訪者： 係呀。

10:45 訪談員： 知道你哋嗰陣時點解...喺咩情況底下呢，係即係...扯入咗呢個事件入便。

10:50 受訪者： 係呀，當然係啦，即係...一般嘅統計嚟講，你諗下，當時點樣樣呢，當時...捲入所謂嘅罷工，即係所謂鬥委會響應罷工，可能真正參加罷工嘅工人六、七萬人，咁涉及嘅家庭呢，連埋家庭應該有成二十萬人，好嘞，咁嘅情況被捕呢，號稱，有啲話五千、有啲話七千，我唔知被捕幾多人，但係判刑呢有啲話三千，現在在案呢，有兩千幾，好嘞，好似我哋 YP (Young Prisoner) 咁樣，裏便包括我哋 YP 呢，都有成...三百個，二、三百個靚仔，死亡，五十幾人，即係死亡好多人就話被...暴動中被暴徒整死嘅，(笑)根本錯，好多係...喺警署畀人打死嗰啲，而家畀人打死嗰啲，有人提喝吓，嗰啲無辜嘅人，或者工會，喺工會辦緊公嘅時候，上去畀人打死嘅人，吓話，即係英軍就死一個，死一個英軍，

吓話，即係裏便五十幾人其實都無辜㗎，唔理係邊邊都係無辜嘅，咁你...呢件事，咁大件事，經歷咗成 67 年差唔多 4 月、5 月開始，到...年底或者 68 年初，先差唔多結束，坐監嘅人最短...最長嗰個坐咗四年，吓，有啲判終生監禁都坐咗四年，就放出嚟，摩星嶺都幾十個，咁...但係你諗下當時香港社會幾多人㗎？其實原來三百萬人都唔夠，現在七百萬，當時...係 67 年嘅統計係唔夠三百萬人，咁你即係二百幾萬人入便有廿幾萬...即係個家庭捲入去你話幾多？咁即係呢啲嘢你唔提係咪等於...冇發生呢？梗係唔係啦，人喺度，或者佢下一代都喺度㗎，吓，即係所以呢個就點解促進我哋...

12:40 訪談員： 促使你哋想做啲嘢。

12:42 受訪者： 我哋想做啲嘢，同埋我肯要講呢樣咁嘅嘢出嚟，吓話，即係我哋覺得已經係...嘩！點解...我哋係唔想講，六七之後呢，曾經有段好短嘅時間呢，我哋呢班人被一...有關方面視為英雄，好嘞，開始工會呀、學校呀、社團啲啲歡迎大會，好似曾德成出獄嗰個歡迎會係我主持嘅，四百人，喺鹽業銀行大廈，嗰個會議室，四百人嘅歡迎大會，英雄，我自己，喺培僑中學，吳康民，同我搞咗個歡迎大會，成千個學生聽，佢哋排隊上嚟將個毛澤東象章掛喺我身裏便，掛咗成唔知...幾多百個，吓，跟住...就組織我哋返大陸，檢查身體，吓，上到去人哋列隊歡迎，英雄，好短嘅階段，即係...有關方面將我哋變英雄，跟住就話畀你聽，er...路線錯誤，呢段嘢唔...唔好提嘞，咁跟住另外呢，社會上，左仔，搞亂香港，吓，英國人，同你...佢英國人呢，都好精，佢唔會點樣詳細講你，總之佢慢慢改政策，總之呢，佢呢班...六七係唔啱，乜乜，咁你就已經班人呢，喺九七回歸之前呢已經係...即係嗰三呀年呢已經靜晒，你唔肯講自己，唔敢講，有人同佢講，er...到時到候，er...又話新華社酒會，祈峰，要向...姬達...表示...六七係做錯嘢嘞，好嘞。

14:35 訪談員： 有件咁嘅事發生過？

14:37 受訪者： 有件咁嘅事發生過，喺七十年代嘅香港，新華社某人去...即係你睇阿張家偉嘅訪問吓，姬達係有講呢段，佢有講人名，但係另一本書呀講祈峰，吓，所以有人呢係向姬達表示六七件事做錯咗，好嘞，跟住呢，呢個係真...真真正正嘅出現嘅事，係周恩來正式向呢個英國領事館話錯，話唔應該燒...咁呢個肯定㗎嘞，即係你有咩理由去燒人咁領事館呢？人咁領士㗎㗎嘛，喺外交上係離晒譜嘅呢啲啲，吓，咁嘅情況之下呢，呢班人仲邊個聲出啫，好嘞，咁又...咁又等啦㗎，等到回歸，好嘞，回歸，又十幾年嘞，又冇人講㗎，咁呢班人死嘅一個，死嘅一個，又冇人講，吓，咁點呢？吓，即係...唔係咁樣嘅，一個遺忘嘅歷史嘅民族呢，係有前途，有希望，特別...你係讀歷史嘅你應該好明白呢樣嘢，最近我睇見一個講話，講得好好聽嘅，佢話其實歷史係學習一種...遺憾嘅...研究歷史係研究一種遺憾，佢講得好好笑，即係歷史...本身係一種遺憾，即係歷史本身就因為唔□，所以先至研究佢，吓，即係有個咁嘅講法，咁但係遺憾，點解都要研究呢？你就...將來避免再發生吓嘛，其實就係避免再發生，特別...即係我自己講嘅感覺呢，即係...回歸後，到行咗十四、五年嘞，我覺得...其實社會嘅氛圍㗎講，係慢慢...即係唔係和諧化，係走去...係激進化添，即係你唔好話...啲議會入便社民連化，er 或者係輿論蘋果化，你連呢，喺...慢慢呢，呢啲咁樣嘅...小小嘅施政嘅失誤或者係大大嘅失誤唔好理啦，喺...特別係八十後入便呢，佢不滿嘅情緒發揮呢，係佢個暴力化，㗎，暴力化係令我哋更加係整個...同六七嘅時候，嘅相似喺邊度，同埋警權嘅過大化。

17:07 訪談員： 係而家過大化定係...

17:09 受訪者： 係現在開始。

17:11 訪談員： 過大化。

17:12 受訪者： 即係你見到一啲咁嘅警權，即係你最近呢啲港大咁嘅事件幾千人去保護一啲咁樣嘅嘢，而少少嘢跟住...你咪搞啲咁樣嘅嘢囉，到我...你搞咩諮詢，遞補機制，

我咪又掙你狗餅，又上台乜嘢，個個面度有個 V 喺度，咁就吓，就咩嘢，呢啲咁嘅事件發生呢，係...係開始呀。

17:37 訪談員： 係咪令你聯想到 67 年時候嘅情況呢？

17:39 受訪者： 係呀，一個聯想同埋我覺得打後幾年會更加...個社會會學去呢便，唔係學去平靜，係學去呢便，點解呢？如果啲人係覺得...即係當時我哋嘅社會氛圍呢，六七...唔係一概而論，當時我哋係貪污啦，警察貪污啦，er...通貨膨脹啦，er...民族嘅嘢啦，等等啦，文化大革命種種嘅嘢，喺度影響，其實當然唔係一樣全部嘢啦，但係有相似嘅地方，就係即係對...所謂一國兩制，其實個新嘅...好話唔好聽，有個另一個叫新殖民主義，吓，即係呢度咁樣嘅嚟到，即係好似...其實回歸祖國，第一亦都係好似一個新嘅宗主國，吓，咁呢度呢，一個咁嘅特區政府，咁係咪一個傀儡政權，咁...呢啲咁嘅嘢嚟講呢，就係好咩嘢，咁呢樣嘢嘅導火線出現呢，如果出現到好似六七情況，即係話經濟係更加向下嘅時候，就仲多呢啲事嘞，噏，即係我自己覺得呢，香港...即係今時今日係一...2011 年嘅 10 月我同你傾偈，咁實際上呢，香港嘅經濟達到...最好嘅階段呢，近幾年呢，以我嘅觀察，樓價、失業率、工資升嘅升幅，最好指標，全部喺今年年初見頂，噏，失業率係歷史上最低，三點幾，樓價，去番中原一百，指數，er...等等，見頂之後，佢一個緩落嘅周期，咁如果...即係你...好似...你美國，點解最近都有啲叫做 **occupy Wall Street**，出嚟，即係啲人如果係有絕望，後生仔就點樣呢？咁呢啲嘢呢，社會已經有啲咁嘅火星喺度，如果佢嘅失業率，打後幾年會升高，假如，或者，經濟係向下滑，更加容易會出現呢樣嘢。

20:04 訪談員： 就可能有 67 年嘅情況會出現嘞。

20:06 受訪者： 唔一定完全一樣，因為 67 年嘅問題就多咗個叫做...即係...或者...即係兩邊先玩到個遊戲嘅，除咗群眾嘅自發性之外呢，除咗英當時中，中裏便呢，除咗北京、倫敦之外，就係港督府同新華社，跑馬地嘅，吓話，現



在呢，就係喺...現在有西環，有特區政府，有北京，  
咁但係另外一邊呢，就有一個好明顯嘅組織嘅。

20:38 訪談員： 有一個明顯嘅政權。

20:40 受訪者： 係嘞，只有一個 V 嘅啫，就有政黨，有公民呀、有社  
民呀、有人民力量呀，呢啲咁嘅...民主黨呢啲咁嘅嘢，  
咁佢嘅能量呢，唔一定做到咁大規模，但係零零星星  
嘅一啲，慢慢暴力化嘅傾向呢...

20:56 訪談員： 就可能會出現。

20:57 受訪者： 係會出現，同埋最...令人係最痛心疾首，係唔應該有  
暴力出現，所以六七嘅事件呢，係一個絕對嘅教訓，  
點解會有暴，有抗暴，有以暴易暴，呢幾個關鍵呢，  
一定要搞清楚，當然啦，第一滴血，係普通老百姓流  
嘅，呢個肯定係英...港英政府呢，係...施暴行先，咁呢  
班係抗暴，抗暴最初係所謂柔和嘅 er...小紅書呀、大  
字報呀示威，咁跟住你又...血洗花園道等等，越嚟越  
多血呢，佢又...又升級，假菠蘿變咗真菠蘿，呀傳單  
唔夠，就菠蘿，吓，變咗其實係一個戰爭嚟嘅，即係  
已經到一個戰爭，咁到底會到咩程度呢？咁...我哋唔  
知道嘞。

21:51 訪談員： 即係你講係而家吓，未來會變做咩情況。

21:54 受訪者： 係嘞，即係香港嘅變化嚟講，我哋係唔知道咩程度。

21:57 訪談員： 咁你睇呢？你係樂觀定悲觀呢？

22:00 受訪者： 唔...我係...你想問我呀？噃，我...我又唔係悲觀到呢，  
就話會大規模嘅暴動，但係我覺得社會嘅動亂、動盪，  
除咗議論之外呢，動盪，特別係年青人呢，即係經常  
一啲嘅...由示威，個便發生嘅抗爭事件到有暴力發生  
呢...

22:30 訪談員： 肢體嘅衝突。

22:31 受訪者： 係會增多，由於你...特別警權嗰方面，因為你...你一便玩唔到遊戲，你兩個先玩到遊戲，即係...當時你諗下捉我哋嘅警察係點暴力呢？現在當然嗰啲已經係斯文好多呀，但係權力嘅過大你永遠都係收窄唔到，唔理係特區警察定係皇家警察，所以我係...近日呢，佢個所謂警權嘅問題，我覺得真係要注意。

23:01 訪談員： 即係你擔心而家啲，而家...

23:03 受訪者： 而家都係呀，即係警權要注意，嗰方面呢，亦都嗰啲咁嘅 V 人呢，嗰啲暴力係應該係要譴責嘅，警權過大亦都要譴責。

23:14 訪談員： 即係你擔心未來警權會過大。

23:16 受訪者： 當然啦，因為權力係永遠都會...

23:18 訪談員： 會失控呵？

23:19 受訪者： 會失控。

33:20 訪談員： 其實就控制權力嗰一方呢，一路擴大好難會令佢可以收得番，即係話要縮小番。

23:26 受訪者： 係呀，咁你諗下呢個政府，以前英國人時代你落區，肥彭，即係嗰啲人落區，大家市民都有乜嘢，佢食蛋糕呀，歡迎傾偈呀，鬧佢呀都有乜所謂，嘩！你現在嗰啲已經係...逢親嗰啲人呢已經係隨時畀人掙嘢呀，即係你諗下係咪呢啲咁嘅情況。

23:51 訪談員： 而家係...係另一種不滿啦，即係可能另一種不滿。

23:56 受訪者： 即係我...我喺...即係我係亂嚟啦，即係我...你頭先問我問題，我有寫嘢好耐，我唯一呢，寫論文呢，係舊年，同阿沈旭暉嗰本書寫咗個序，個序裏便呢，我自己比較滿意少少呢，就其中一段...我講，用佢其中一個理論嚟分析 er...呢一百七十年嚟中英...唔係，呢個香港嘅情況，我仲用一種叫對峙式淪陷。

24:22 訪談員： 對峙式淪陷。

24:23 受訪者： 對峙式嘅淪陷，呢個理論，愛嚟解釋現在嘅情況，即係實際上呢，其實兩...意識型態、群眾組織，係對峙式，係最後係食一面㗎，左右交叉或者前後交叉，係最後便係一方面或者咩嘢，都係香港呢個地方發生，你用呢個分析六七呢，都可以分析到，你用嚟分析目前亦都可以分析到，實際上一國兩制，就係呢兩個制度嘅競爭，所以一...所以深層次矛盾係解決唔到呢，就係一國，點解要有兩制呢？一國兩制本身就係深層次矛盾，即係話呢，我...就算佢唔係主動做大陸都好，我哋意識型態、我嘅方法、我嘅咩嘢，係希望能夠改變咗你嘅狀態，而你哋香港呢班人就係想用你所講核心價值，民主、自由等等，而改...首先改造咗香港，然後改造中國，實際上呢個係唔會停嘅一個...狀態，係令到香港唔會...喺一個動嘅狀態裏便，唔喺一個靜嘅狀態裏便，呢個情況係同我哋...譬如我，好似我每年都會飛落澳洲，我喺澳洲呢，十日、八日，我覺得好平靜，我唔需要...有呢啲咁嘅煩惱喺度，呢班人，全部社會福利有晒，經濟好唔好，都唔關係，佢有社會福利，哦，打開電視，兩個黨嗌緊交，我知佢拗呢，唔會有...社會上有啲咩嘢㗎，佢拗咪至多...少咗呢個，連總理都有得撈，而家就政變就個女人上去做總理，就係嘞，有咩嘢呢？即係你...

26:11 訪談員： 即係倒台囉最多。

26:13 受訪者： 係嘞，你好 peaceful，即係你唔會憂慮佢有任何咩，而香港呢個地方你唔會，你...你唔知佢會有啲咩嘢，會出嚟，吓話，即係...因為每一樣...個對峙佢對方一定要掙紮對方為止，對方一定要掙紮對方為止，呢個最明顯嘅情況就係南、北越嘅情況，一便食咗一邊，即係南、北韓都好似...假假地喺中間，但係永遠唔會解決呢個問題，即係好似中國同台灣，始終中華民國同中華人民共和國兩個係對峙式嘅嘢，呢個係我覺得呢...即係我盜竊咗(笑)阿沈旭暉講嘅呢個理論呢，我覺得我自己發揮咗一個講法，放喺香港呢，係冇變到㗎，即

係呢個對峙式嘅淪陷嚟講呢，其實，所謂我哋支聯會，就係想用呢樣改變中國，你其實我一...所謂結束一黨專政，你係用井水犯緊河水，你干涉緊中國事務，但係點解要干涉呢？佢唔改變呢個，你香港都唔咁，你明唔明呀？咁你大陸一樣之嘛，你一定要個特首我係要同意你㗎，你選邊個我都要同意你㗎㗎，因為你唔係一個獨立國家㗎嘛，唔通最後要走獨立咩？你係咪最後要起義呢？我畀唔畀你五區公投呢？吓，畀唔畀你咁呢？所有嘅問題就係...就係...所以變成香港係一個...就算回歸後呢，個局勢冇變到，仲係一個矛盾，所有嘅矛盾集中，係搵機會爆發嘅一個狀態，係一個動嘅狀態，唔係一個靜嘅狀態，吓，而呢個動嘅狀態呢，隨着佢個...社會嘅變化，係會更加...有陣時平靜啲，有陣時會激烈啲，如果大家...社會民生好，或者大家咩，就會好啲，經濟衰啲，或者咩嘢...

28:13 訪談員： 又差啲。

28:14 受訪者： 董建華就係咁下台囉，係咪？經濟衰，又沙士，又無能，又...總之講嚟，示威，咩嘢，咁所以呢樣嘢呢，就真係現在一個新嘅...有啲睇法嗰個移民呀，即係新嘅移民潮嘅嚟到呢，係亦都有...即係可以預期嘅發生。

28:34 訪談員： 即係呢樣嘢好多人都好似...好似你或者我咁樣，都開始有啲不安。

28:39 受訪者： 係嘞，不安，佢會社會動盪，啲細路仔會冇心機讀書。

28:43 訪談員： 嗯，或者呢個環境太嘈吵。

28:45 受訪者： 係嘞，太嘈吵，即係你...令到自己心煩之嘛，吓話。

28:50 訪談員： 所以你哋 67 年個經歷呢，有過咁嘅經歷呢，你睇而家即係更加...更加會有一種 er...

28:55 受訪者： 係呀。

28:56 訪談員： ...可以一種參照性或者比較嘅情況出現。

28:58 受訪者： 冇錯，雖然相距咗四呀幾年，出年就四呀五年嘞，但係即係...係呀，會有個對比嘅度，benchmark 嘅度呢，係更加感覺到呢個情況。

29:09 訪談員： 講到呢度嘞。

29:10 受訪者： 好呀，多謝你。

29:11 訪談員： 多謝你。

（本段結束）